

րին: Նաւի այդ անսպասելի այցելութիւնը մի տեսակ նախախնամական բնոյթ էր կրում. հեռաւոր այդ ուրուականը թառել էր հոգիները ալեկոծուած ծովի վրայ եւ երազի նման նայում էր դէպի հեռուն:

Մինչ մասնագէտները շարունակում էին աւելի քան երեք տարակուսիլ, գիտէք էլի՝ քմծիծաղ, իմաստակութիւն, բամբասանք, բուն ժողովուրդը այդ մեծ երախան, ուզում էր հաւատալ, պէ՛տք ունէր հաւատալու: Պարոնայք ինժեներները, զինուած գիտութեան բոլոր տուեալներով, ապացուցանում էին՝ $2 \times 2 = 4$, որ աչքի առաջ ունենալով քաղձաթիւ զառիվերները, ճանապարհի դրութիւնը, նրա օձայտոյտ բնոյթը եւ հազար ուրիշ անյայտելի պատճառներ անկարելի են դարձնում, որ նաւը տեղ հասնի: Իսկ նաւապետը, այլեւս ծիծաղելի, քրտնաթոր վազվզում էր, բացատրում, համոզում, պոռում, կանչում: Արտվեան փողոցը անցնելու համար մի ամիս դրին ու նաւը, երբ հասաւ Նորքի ստորտը, ուժասպառ թեքուեց եւ իր ծինելոյցը պարապ թնդանօթի նան ուղղեց դէպի Արարատ: Դէ՛, հիմա տեսնենք, ինչպէ՞ս պիտի բարձրանայ: Բարձրացա՛ւ: Լծկան եղների թիւը աւելացրին, անիւներին երկաթ խփեցին եւ ՍիդիՖը ուսերի վրայ պողպատ զետեղեց:

Նաւը կանգ առաւ Երեւանի կատարին՝ Նոյեան տապանից դուրս եկած հսկայ մի թըռչունի պէս: Նա նստեց մրափող, զաւառային այս քաղաքի գլխին, հեռաւոր ծովերի անըրջային տեսիլքի նման, եւ պարտադրեց իր ներդաշնակ ձեւը: Իսկապէս, չկայ աւելի գեղեցիկ յղացում քան նաւային ճարտարապետական ձեւը: Տրամարանական, հաւասարակշիռ, ներդաշնակ եւ պարզ: Ոչ մի աւելորդ գիծ, ամբողջական, սլացիկ՝ մարմին առած նետի նման, հաստատուն եւ անփոփոխ իր նախնական բովանդակութեան մէջ:

— Նաւը քաղաքի վրայ...

— Մի տեսակ կենդանի արձան՝ խորհրդանշանական եւ հրապուրիչ: Նրա ստուերը տիրում էր առօրեայ կեանքի վրայ, ուժ եւ հաւատք էր ներշնչում, ոսկէ երազներ էր արթնացնում: Նաւը Արազածի եւ Մասիսի դէմ, Արարատեան դաշտի վրայ՝ պատրաստ ճախրելու... Երեկոները, երբ Արարատը բո-

ցերի մէջ թաւալ էր դալիս, նրա ճերմակ մտերի վրայ վարդագոյն ճառագայթներ էին թառում եւ նաւը նմանում էր սիրահարուած մի աղջկայ, որ դիտում է այրուող հորիզոնը...

Քանաքեռի մօտ սկսուեց նրա Գողգոթան: Աշունը, տխրադալուկ աշունը, ամպ եւ անձրեւ բերաւ: Ամէն ինչ դժուարացաւ: Տարուան այդ եղանակին երթեւեկութիւնը շատանում է. գիւղացիները սայլերով փայտ եւ պաշար են տանում քաղաք, իսկ ճամբան առանց նրան էլ նեղ է: Մարդիկ նախ զարմանքով նայեցին. դա՛ ինչ էր, ճամբան եկել կտրել էր: Դժուարութեամբ շրջեցին. սկսեցին մրթմրթալ, բողբոջ. «էդպէս էլ բան կ'ըլի... էդպէս էլ բան»... Ու կարծես, բաւական չէր, որ խճուղին անանցնելի էին դարձրել, դեռ, ամէն անգամ, աղաչում պաղատում էին, թէ եղներդ մի վայրկեան տուր, մի քիչ էլ քաշենք...

Ախտայի մօտերը ցեխը շատացաւ, սկսեց սաստիկ հով փչել եւ լեռներից իջաւ սառը մի ցուրտ: Զառիվար իջնող ճամբան բոլորելու ժամանակ անիւները փուլ եկան եւ նաւը աղմուկայից հառաչով նետուեց դուրս եւ կողքի վրայ վայր ընկաւ: Զմեռ էր, ձիւն: Նաւապետը սարսափած, մատերը մազերին տարաւ եւ խենթի նման սկսաւ դառնալ: Պարոնայք ինժեներները ուրախ էին: Ասացինք՝ չլսեցին. նախընտրեցին հաւատ ընծայել, արկածախնդրել, շահամոլ, անյայտ եւ մութ մի անձնաւորութեան. դէ՛, հիմա թո՛ղ դնան էլը ցեխից հանեն:

Քաղաքը, որի վրայից նաւը անցել էր երազի նման, այլեւս տարուած իր նեղմիտ, քաղքենի եւ մզլոտուած կեանքով, սկսեց անպատկառ կատակներ անել: «Նաւը ուշաթափուել ա... է՛ն ա նաւարկում ա ձիւնի վրայ... վազում ա, վազում ա»... Նաւապետը էլ չէր կարողանում փողոցում երեւալ: Նայում էին, ծիծաղում, խօսք նետում: Ընկե՛ր աղմիրալ, ընկե՛ր աղմիրալ, Սեւանայ ծովի նաւատորմիցը ի՞նչ եղաւ:

— Ամբոխը:

— Դեմոկրատիան. la cannaille...

— Իսկ նաւը պտուկել էր ցեխի եւ ձիւնի մէջ՝ սպաննուած փիղի նման: Ի՞նչ խղճալի տեսարան էր իսկապէս: Այս լեռների վրայ, ինչպէս տեսնում էք, ձմեռը բռնակալ է եւ ա-